

五礼通考

第十二册

五禮通考卷第二百二十一

內廷供養禮部侍郎詹曠秦萬編輯

翰林院編修嘉慶錢大昕

參校

李太保總督蘇部御史桐城方觀承同訂

賓禮三

天子受諸侯覲

儀禮覲禮

鄭目錄云覲見也諸侯秋見天子之禮春見曰朝夏見曰宗秋見曰覲冬見曰遇朝宗禮備覲遇禮省是以享獻不見焉三時禮亡

惟此存爾覲禮于五禮屬賓

蕙田案敖氏謂此篇言同姓大國之君入覲

於王之禮初無四時之別與周官秋見曰覲

之意異此說非也四時之朝宗覲遇散文言

之皆得名朝王制天子無事與諸侯相見曰

朝春秋五月公朝於王所是也朝又可名覲

詩韓侯初立來朝曰韓侯入覲春秋傳晉侯

朝王稱出入三覲是也其不云宗遇者鄭氏
謂夏宗依春冬遇依秋故以朝覲爲大名也
對文言之則當依當宁在朝在廟其禮固區
以別矣傳記舉其一偏故朝覲可以通言儀
禮記其節目故朝宗覲遇不可以不辨盛世
佐云此篇自郊勞以前賜車服以後文多不
具必其詳已見於朝禮故略之也禮經之逸
者多矣執此區區之僅存者而謂其所不見
者皆無是禮也豈通論哉此言得之

覲禮至于郊

注郊謂近郊去王城五十里

張氏爾岐曰此下言侯氏入覲初至之事至郊則郊勞至國則賜舍凡二節

欽定義疏王畿千里王城居中畿面各五百里界首置
關面各三關凡十二關司關掌之侯氏之來也君先

與卿圖事遂戒宰書幣夕陳幣設監守太子曰監國
諸侯之兄弟曰處守乃告於祖奠於禰告於社稷山
川之神君行卿大夫士介從師從奉主車祖祭而出
見日而行逮日而舍奠過他邦則假道至於關啟關
人而司關爲之告焉由二百里內之遂及百里之遠
郊至五十里之近郊中間如遂人遣人委人各爲之
委積掌訝環人野廬氏各爲之聚橐而凡王官各贍
其事聘禮賓在國受命啟行過邦入境具詳此從至
于郊始見者文略也抑諸侯適天子尙有他篇其禮
文可以互見而今逸之與

王使人皮弁用璧勞侯氏亦皮弁迎于帷門之外再拜

注小行人職曰凡諸侯人王則逆勞于畿則郊勞者大行人也皮弁者天子之朝
朝服也璧無束帛者天子之玉尊也不言諸侯言侯氏者明國殊舍異禮不凡之
也郊舍狹寡爲帷宮以受勞掌舍職曰爲帷宮設旌門疏案大行人上公三勞
侯伯再勞子男一勞則五等同有畿勞其子男惟有此一勞而已侯伯又加達郊

勞上公又加近郊勞此云近郊據上公而言案玉人職云案十有二寸棗栗十有二列諸侯純九大夫純五夫人以勞諸侯注云夫人謂王后此文不見者以聘禮于聘客主國夫人尚有勞以二竹簋方明后亦有略言王勞不言后文不具也聘禮亦受勞于館不為帷宮者彼臣禮卿行旅從徒眾少故在館此諸侯禮君行師從徒眾多故于帷宮

敖氏繼公曰勞而用璧以為信天子于諸侯之禮也璧無束帛別于享禮且為其當還之也

使者不答拜遂執玉三揖至于階使者不讓先升侯氏升聽命降再拜稽首遂升受玉

注不答拜者為人使不當其禮也不讓先升奉王命尊也升者升壇使者

東而致命侯氏東階上西面聽之疏以帷宮無堂可升故知升者升壇也

敖氏繼公曰使者不讓則侯氏不先讓可知侯氏不讓者以使者尊當先升而不敢讓之也其降拜于階間北面升就使者北面訝受之

蕙田案侯氏受玉之位當在西面與使者相並下云使者左還而立是使者于授玉之後方南面明是時猶東面也敖氏以為北面訝受之非是

使者左還而立侯氏還璧使者受侯氏降再拜稽首使

者乃出

注左還還南面示將大也立者見侯氏將有事于已俟之也王重禮疏直云使者左還不云拜送玉者凡奉命使皆不拜送若身自致者

乃拜

蔡氏德晉曰前降拜受

王也後降拜送玉也

侯氏乃止使者使者乃入侯氏與之讓升侯氏先升授

几侯氏拜送几使者設几答拜

注侯氏先升賓禮統焉几者安賓所以崇優厚也上介出止使者則

已布席也

疏聘禮卿勞受僨不設几者諸侯之卿卑不與此同也几不可設于地明有席聘禮受聘云几筵既設是几筵相將

敖氏繼公曰有司既布席侯氏乃出止使者止其去也且迎而欲僨之使者亦禮辭許侯氏揖先入使者乃入也既入不言三揖者如上禮可知讓升侯氏與使者三讓而先升使事

既畢則行賓主禮也

楊氏復曰今案凡布席設几皆

在西北位此帷宮恐亦當然

欽定義疏聘禮郊勞勞者出授老幣出迎勞者勞者禮

辭賓揖先入勞者從之鄰國之卿體敵猶出迎勞者

侯氏於王使出迎可知蓋是時上介先出止之侯氏

隨出迎之經故云侯氏乃止使者疏謂侯氏不出蓋

誤此几席其莞筵紛純彤几與

侯氏用束帛乘馬僎使者使者再拜受侯氏再拜送幣

注僎使者所以致尊敬也拜者各于其階使者降以左驂出侯氏送于門外再拜侯

氏遂從之注驂馬曰驂左驂設在西者其餘二馬侯氏之士遂以出授使者之從者于外從之者遂隨使者以至朝疏陳四馬與人以西為

上聘禮禮賓時賓執左馬以出此亦以左驂出故知左驂設在西也

敖氏繼公曰四馬象在車前故西者曰

左驂駕車之馬兩服居中兩驂在傍

郝氏敬曰左驂庭寔四馬最

西一馬也馬首北以西為左

高氏愈曰遂從之者以天子勞使

既至故不敢即安而急趨王所也

蕙田案以上郊勞

天子賜舍注以其新至道路勞苦未受其禮且使即安也賜舍猶致館也所使者司空與小行人為承摯今文賜作錫疏聘禮賓至于朝君

使卿致館此不言致館言賜舍者天子尊極也聘聘致館賓主人各摯介故知此亦陳摯介必知使小行人為承摯者案小行人云及郊勞眠館將幣為承而摯是

其義也

李氏如圭曰聘禮賓至即欲受之者主人之禮觀禮且使即安者君上之惠

曰伯父女順命于王所賜伯父舍

注此使者致館辭疏此及下經皆云伯父謂同姓大國舉同

姓大國則同姓小國及異姓之國禮不殊也

欽定義疏上文侯氏遂從之蓋從使者至朝告至也與聘禮下大夫勞者遂以賓入至於朝之義同其時天子即降賜舍之命於是小行人帥至於館而司空乃宣是命辭於舍門外焉聘禮曰大夫帥至於館卿致館其義例可推也

侯氏再拜稽首

注受館

敖氏繼公曰不著其所是于舍門外也使者東面致命侯氏西面聽命既則北面拜

儻之束帛乘馬

注王使人以命致館無禮儻儻之者尊王使也侯氏受館于外既則儻使者于內

敖氏繼公曰侯氏于使者亦有迎送之拜不言者文略耳下于大夫戒之禮亦然方氏苞曰此下當有設飧之禮及期侯氏有展幣之禮以皆前見故文不具

蕙田案以上賜舍

天子使大夫戒曰某日伯父帥乃初事

注大夫者卿為訝者也掌訝職曰凡訝者賓客

至而往詔相其事戒猶告也其為告使順循其事也初猶故也

侯氏再拜稽首

注受覲日也

張氏爾岐曰此下言將覲之事王使人告覲期諸侯先期受次于廟凡二事帥乃初事者遵循朝覲之舊典也

蕙田案以上戒日

諸侯前朝皆受舍于朝同姓西面北上異姓東面北上

注言諸侯者明來朝者眾矣顧其入覲不得並耳受舍于朝受次于文王廟門之外聘禮記云宗人受次次以帷少退于君之次則是次也言舍者尊舍也天子使掌次為之諸侯上介先朝受焉此覲也言朝者覲遇之禮雖簡其來之心猶若朝也分別同姓異姓受之將有先後也春秋傳曰寡人若朝于薛不敢與諸任齒則周禮先同姓疏春夏受贊于朝無迎法受享于廟有迎禮秋冬受贊受享皆在廟並無迎法是以大門外無位既受覲于廟故在廟門外受次天子春夏受享諸侯相朝聘迎賓客者皆有外次即聘禮記宗人受次是也有外次于大門外者則無廟門外之內次天子當依而立諸侯北面而見天子曰覲彼諸侯皆北面也曲禮云天子當依而立諸侯北面而見天子曰覲彼諸侯皆北面不辨同姓異姓與此不同者此謂廟門外為位時彼謂入見天子時

李氏心傳曰受舍

于朝所謂外朝也

欽定義疏受舍於朝其地當在皋門以內庫門以外屬

外朝之東西一以來覲者眾餘地能容一以賓車不

入大門下行爲近也若廟外則覲日陳擯介又諸侯亦當有從臣執幣馬者在焉占地多矣且覲尙嚴廟外宜肅苟盡張次於此儀衛紛囂非所以爲敬也受舍之舍與賜舍之舍別賜舍之舍館舍也有屋宇蓋司空之屬掌之受舍之舍次舍也以帷幕天官之屬掌之

蕙田案經云受舍於朝則以爲在外朝者得之注疏謂在廟門外疑非

又案以上受舍於朝

侯氏裨冕釋幣于禩

注將覲質明時也裨冕者衣裨衣面冠冕也裨之爲言卑也天子六服大裘爲上其餘爲裨以事尊卑服之而諸侯亦服焉上公衮無升龍侯伯鷩子男毳孤希卿大夫元此差司服所掌也禩謂行主遷主矣而云禩親之也釋幣者告將覲也其釋幣如聘大夫將受命釋幣于禩之禮既則祝藏其幣歸乃埋之于祧西階之東

陳氏祥道曰聘賓釋幣于廟故舉幣而埋之侯氏釋幣于行主故舉幣而藏之

郝氏敬曰古者大事出奉其廟主行有事則告裨猶副也天子衮冕為正諸侯以下冕服為副天子受覲于廟所以昭先烈也諸侯入覲告禰所以率先職也張氏爾岐曰此下至升成拜降出備言入覲之事質明先以將覲告行主乃入覲以瑞玉為贄次行三享次肉袒請罪凡三節王勞之乃出裨冕者上公衮冕侯伯鷩冕子男毳冕也案玉藻諸侯元冕以祭不得服衮冕以下而此裨冕釋幣于禰者以將入天子之廟故服之也盛氏世佐曰上公衮冕九章侯伯鷩冕七章子男毳冕五章皆其上服也而謂之神者據玉而言猶記以金路以下為偏駕也玉藻亦云諸侯元冕以祭裨冕以朝是三禮所言合矣侯氏裨冕為將朝也釋幣則因事而服之耳故與正祭異也諸侯于其國雖祭不得服其上服惟于朝天子及助祭之時服之而敖氏又謂當服其次則上服更何所服之乎其說蓋不可通矣禰注以為遷廟主據曾子問而言也但彼所云乃天子巡守之禮諸侯述職無明文故敖氏直以為考據經而斷近得其實當從之

蕙田案以上釋幣於禰

乘墨車載龍旂弧韞乃朝以瑞玉有纁

注墨車大夫制也乘之者入天子之國車服不

可盡同也交龍為旂諸侯之所建弧所以張繆之弓也弓衣曰韞瑞玉謂公桓圭侯信圭伯躬圭子穀璧男蒲璧纁纁所以藉玉以韋衣木廣表各如其玉之大小以朱白蒼為六色 疏爾雅說旂旒正幅為繆故以此弧弓張繆之兩幅也月令云帶以弓韞韞是弓衣可知

敖氏繼公曰乘墨車屈也載龍旂不沒其實也晉韓宣子聘于周自稱曰士大國之卿自比天子之士則其君自比于大夫宜也

盛氏世佐曰凡旂旒之屬皆有弧以張繆弧上又畫在矢考工記弧旌枉矢以弧是也龍旂弧韞載之于車以為飾也龍旂象文德也載弧不忘武備也于

龍旂則張之弧則韞之以韞是天其文德雖有武備而不用也一車飾也而先王之寓意深矣

欽定義疏墨車白士昏乘之為攝盛自入覲乘之則為屈交龍之旂五等所同旂數則異弧以張繆必備韞者為將斂也聘禮釐有張斂此亦然與

天子設斧依于戶牖之間左右几

注依如今綈素屏風也有繡斧文所以示威也斧謂之黼几玉

几也左右者優至尊也其席莞席紛純加纁席畫純加次席黼純疏爾雅牖戶之間謂之展以屏風為斧文置于依地綈赤也素白也漢時屏風以綈素為之象古者白黑斧文故鄭以漢法為況周禮司几筵云左右玉几注左右有几優至尊也又太宰云贊玉几注云立而設几優尊者但几惟須其一又几坐時所以憑依今左右及立兩設之皆是優至尊也兩注相兼乃具

郝氏敬曰神几尚右人几尚左左右兼設以安至尊為神人其主也

天子衮冕負斧依

注衮衣者裨之上也續之為九章其龍天子有升龍有降龍衣此衣而冠冕南鄉而立以俟諸侯見疏

負謂背之南面也

嗇夫承命告于天子

注嗇夫蓋司空之屬也為末擯承命于侯氏下介傳而上上擯以告天子天子

見公擯者五人見侯伯擯者四人見子男擯者三人皆宗伯為上擯疏周禮司儀職兩諸侯相朝皆為交擯此諸侯見天子亦交擯可知此所陳擯介當在廟之外門東陳擯從北向南門西陳介從南向北各自為上下嗇夫承命告于天子則命先從侯氏出下文天子得命呼之而入命又從天子下至侯氏即合入此觀遇

之禮略惟有此一辭而已司儀云交擯三辭者據諸侯自相見于大門外法其天子春夏受享于廟見于大門外亦可交擯三辭矣大宗伯職云朝覲會同則爲上相注云出接賓曰擯入詔禮曰相若四時常朝則小行人爲承擯故小行人職云將將爲承而擯此文嗇夫爲末擯若子男三擯此則足矣若侯伯四擯別增一士上公五擯更別增二士若時會殷同則肆師爲承擯

欽定義疏廟在庫門內之左將覲質明時侯氏至外朝下車入次俟王入廟升堂負斧依而立然後侯氏入庫門而左至於廟門外接西塾東面乃襲執玉擯介既設於是嗇夫乃承侯氏請覲之命于下介遞傳而上上擯入告天子經云嗇夫承命告于天子乃約其儀以爲文嗇夫未必得入廟也

蕙田案周禮五官無嗇夫故鄭疑爲司空之屬考之漢書上林虎圈有嗇夫百官表縣置嗇夫漢去古未遠其職雖不盡同而官名相因必有自矣夏書嗇夫馳見于古文允征篇

則其爲天子之官無疑敖氏以嗇夫爲大夫之誤盛氏則以嗇夫爲諸侯之末介二說似皆未然

天子曰非他伯父實來予一人嘉之伯父其入予一人

將受之

注言非他者親之辭嘉之者美之辭也上擯又傳此而下至嗇夫侯氏之下介受之傳而上上介以告其君君乃許入今文實作寔嘉作賀

侯氏入門右坐奠圭再拜稽首

注入門右執臣道不敢由賓客位也卑者見尊奠摯而不授

欽定義疏聘禮從賓道者皆入門左聘與享是從臣道者皆入門右賓介私覲是也侯氏初入門執臣道

故右也

擯者謁

注謁猶告也上擯告以天子前辭欲親受之如賓客也其辭所易者曰伯父其升

欽定義疏經止稱擯者謁注知爲上擯者以聘禮擯者

之爲上擯決之也然則承擯以下其亦在門內之東

負東塾而立與

侯氏坐取圭升致命王受之玉侯氏降階東北面再拜稽首擯者延之曰升升成拜乃出

注擯者請之侯氏坐取圭則遂左降拜稽首送玉也從後詔

曰延延進也疏侯氏得擯者之告坐取圭即言升致命無出門之文明知遂向門左從左堂塗升自西階致命也從後詔禮曰延者以其賓升堂擯者不升

敖氏繼公曰拜于西階東別于內臣也侯氏既成拜宰乃受王以東是時王于侯氏之拜皆不答所以見至尊之義也

欽定義疏坐取圭而遂左者賓禮也以擯者謁而天子辭之故也王既受玉以授宰則謁侯氏出則亦謁而奉束帛加璧以享矣

蕙田案以上觀

四享皆束帛加璧庭實唯國所有

注四當為三古書作三四或皆積畫此篇又多四字字相似由

此誤也大行人職曰諸侯廟中將幣皆三享其禮差又無取于四也初享或用馬或用虎豹之皮其次享三牲魚腊籩豆之實龜也金也丹漆絲纊竹箭也其餘無常貨此地物非一國所能有惟所有分為三享皆以璧帛致之疏三牲魚腊籩豆之實以下皆禮器文彼諸侯國為王祫祭而致之與此因觀致之同云璧帛致之者據享天子而言若享后即用琮錦但三享在庭分為三段一度致之據三享而言非謂三度致之為皆也

蕙田案鄭氏破四享為三享據大行人職而

言先儒皆從之獨郝仲輿以爲四享者諸侯
五等子男同等故四也案五等諸侯雖入覲
同時受之必有先後且三享庭實甚多若五
等諸侯之享禮一時並陳恐廟庭亦不能容
郝說殊誤

奉束帛匹馬卓上九馬隨之中庭西上奠幣再拜稽首

注卓猶的也以素的一馬以爲上書其國名後當識其何產也馬必十匹者不敢
斥玉之乘用成數敬也疏中庭南北之中不參分庭一在南者以其三享同陳
須入庭深設之故也

敖氏繼公曰匹馬卓上謂以一馬卓然居前而先行
明其入不與九馬相屬也此奠幣蓋于入門左之位
郝氏散曰特出曰卓一馬中庭卓立九馬羅列
于後先進者從西以次并列而東故曰西上

蕙田案卓字之義當以敖氏郝氏爲長周禮
校人職云大祭祀朝覲會同毛馬而頒之齊
其色此侯氏享禮之馬亦當然注疏以卓爲

素的疑非也但敖氏謂一馬卓然居前者據初入門而言及其陳於中庭仍與九馬並列而居左故下文以馬出授人解爲左馬非匹馬一行九馬別爲一行也

擯者曰子一人將受之

〔注〕亦言王欲親受之

蕙田案受覲聽事所稱天子之命皆擯者述之彼云天子此云擯者彼此互見爲義

侯氏升致命王撫玉侯氏降自西階東面授宰幣西階前再拜稽首以馬出授人九馬隨之

〔注〕王不受玉撫之而已輕財也以馬出隨侯氏出授

王人于外也王不使人受馬者至于享王之尊益君侯氏之卑益臣疏幣卽束帛加璧并玉言幣故小行人合六幣皮馬與玉皆爲幣宰卽太宰太宰主幣周禮太宰職云大朝覲會同贊玉幣玉獻玉几玉爵注云助王受此四者是也春夏受贊于朝雖無迎法王猶在朝至受享又迎之而稱賓主覲禮受享皆無迎法不下堂而見諸侯已是王尊臣卑王猶親受其玉至于三享使自執其馬王不使人受之于庭是王之尊益君侯氏之卑益臣也諸侯覲天子享天子訖亦當有幣問公卿大夫隱七年左氏傳云戎朝于周發幣于公卿是也